


Entrante 1 di Januari:

HOSPITAL TA DECLARA LIBER DI HUMAMENTO!!

ORANJESTAD (AAN) -- Dia 1 di januari 1999 Hospital Horacio Oduber lo worde declara "liber di humamento". Pa varios siman caba a forma un comision, presidi pa doctor Percy Ho-Kang-You, pa traha riba e proyecto aki. Pa duna informacion al respecto, den sala di reunion di Hospital a tuma lugar ayera atardi un conferencia di prensa, den cual tabata presente tur e miembronan di e comision, cual ta integra pa:

sra.Rita Delamare, Sr.Ruben Croes, dr.Percy Ho-Kang-You, sr.John Fun, sr. Frank Figaroa, y srta.Sheila Arends. Dr.Percy Ho-Kang-You, director di hospital y alavez presidente di e comision a splica di con a yega na e decision aki.

"Entrante 1 di januari, enberdad hospital ta worde declara liber di huma. Esey ta nifica cu tur espacionan den e edificio di hospital, cambernan di



pacient y e departamentonan unda ta haci test, ta worde declara liber di huma, y te hasta 10 meter di distancia di e porta di entrada di hospital lo worde prohibi pa huma for di e fecha menciona", dr.Ho-Kang-You a bisa.

El a agrega cu tin un comision cu a traha durante un par di siman riba e proyecto aki, y cu e decision aki ta pas den e maneho di Ministro di Salubridad Publico.

PLAN DI ACCION

Seguidamente Sr.Fun a menciona cu tabata masha facil pa simplemente pa manda un memo den hospital, y pone un diseño riba porta caminda ta bisa cu "den e edificio aki bo no mag huma".

Pero mirando cu e problema ta bay un tiki mas leu cu esey nan a dicidi di bin cu e proyecto menciona.

"E ta asina cu na hopi pais di Europa y tambe na Merca ley ta prescribi cu den edificacionan publico bo no mag huma.

Nos no tin un ley asina na Aruba, pero nos ta na altura cu tin un ley similar den preparacion y aparentemente sra.Mary Wever tempo cu e tabata Parlamentario a prepara e concepto di ley pero otro hende mester pasa e ley. En todo caso e ley no ta existi y nos ta, probablemente, e prome instancia cu oficialmente ta anuncia cu no mag huma den nos facilidad".

Sr.Fun a sigui bisa cu nan a haya necesario pa duna e decision aki un poco di publicidad y haci e pueblo conciente cu e humamento ta malo pa bo salud y cu for di e punto di bista aki nos ta dicidi di prohibi humamento den hospital.

"Durante e resto di e luna aki nos ta bay pone algun propaganda den medianan di comunicacion, caminda nos ta anuncio e hecho cu ta bay tin e prohibicion aki. Na tur lugar di hospital nos ta bay pone poster tambe cu ta indica cu entrante dia 1 di januari nos ta bay declara edificio di hospital liber di humamento", Fun a acentua. Den e intencion aki, Sr.Fun a pidi prensa pa dedica un tiki di atencion durante e luna aki y otro luna riba e tema di humamento y tur e problema y consecuencianan cu esaki por trece cune.

Riba potret por mira e Comision momento cu e conferencia di prensa a tuma lugar, y tambe un exhibicion di material informativo den e sala, tocante humamento y su peligran pa salud di hende.